

## QVÆSTIO MEDICA.

Quodlibetariis disputationibus manè discutienda in Scholis Medicorum, die Jovis 17. Decembris.

M. DIONYSIO PUYLON, Doctore Medico, Præside.

*An Innupta Aui Brevioris?*

**V**ITAM cuius facilius quam vitæ studium abstuleris. Est quædam rerum omnium, nulla vitæ fatietas. Sed cum primam ex natura hanc habemus appetitionem, ut conservemus nosmetipsos: tum certe nihil ad beatè diuque vivendum præstabilius, quam secundum naturam vivere. Est enim omnis natura diligens ac conservatrix sui, quam si ducem sequemur, nunquam aberrabimus. Si quis autem arbitrio suo regi, quam ei morem gerere ac vitæ magistrum habere maluerit; quidnam ei contingenti quod à recta & expedita via deflectentibus usu venit? Per salebras ac scopulos repere videbis, frequenter labi; imò & nonnunquam ferri præcitem: eos videlicet innumeris fere subiacere morbis, miserrimam vitam inter dolores ac luctus trahere, immaturo denique occumbere fato necesse est, qui rebus iis quæ secundum naturam sunt fruenter vivere neglexerint. Ut enim à natura oritur apta hæc atque conveniens inter se corporis partium humorumque consensio, in qua bona valetudo posita est; ita & ejus stat viribus arque conservatur: quâ sublata, quid est aliud vivere, quam dolere, fatalemque ac brevem interitum opperiri. Hinc quæcumque sunt in rerum natura (sed omne præsertim viventium genus) naturæ legibus cupidissimè parent; his enim rei cuiusque salus ac custodia continetur, itaque si semel hæc fundamenta everteris, omnia constat in pejus ruere ac retro sublapta referri.

**P**RINCIPIO ea quæ gignuntur è terra certis temporibus conferi, coalescere, folia emittere, crescere, fructus, semina effundere natura voluit; nec ista ubique, sed propriis ac convenientibus locis: alia quippe arenti ac sylvestri solo, alia udo ac uliginoso delectantur; quædam in convallibus feliciter veniunt, quædam in collibus enascuntur: si quis autem rationem antevertere, arte ac medicamentis messem maturare, fertilitatem inducere, aliò fruges traducere voluerit, nonne aut statim arescent aut ingentem virutem brevi exuent? Dedit autem belluis sensum & appetitum, ut altero fecernerent pestifera à salutaribus, altero conatum haberent ad ea quæ sibi convenientia sunt obtinenda: itaque famem sitimque non modo graviter ferunt: sed nisi expleantur, exhaustæ viribus, macie confectæ brevi intereunt. Ardor vero suscipiendæ prolis, quo statim anni temporibus incendantur, quanto eorum periculo cohibetur? Sæpe aviculas, quæ citis inclusæ tenentur, dum maris aut feminæ copia desit, tentigine rumpi, & venerea tabe extingui videas. Mirum vero cum in sylvis naturæ suæ permittæ versantur (quod est omne animal libertatis amans) quanto se opere custodiunt, ut in pastu circumspiciant, ut in cubilibus delitescant, soliusque naturæ instinctu, optimæ scilicet omnium medicæ, morbis ac vulneribus suis medentur. Quod si laqueis interceptæ fuerint, veluti merore confici cernimus; adeo ut nihil eis lethale magis ac pestiferum fuerit, quam naturæ moribus obsequi prohiberi. Eandem in homine videmus sive in somno ac vigiliis, sive in cibo potaque capellendis, quæ corpori oneri esse possent, naturæ obsequendi necessitatem; adeo nihil est, in quo non naturæ ratio intelligentis sui que ipsius custodis appareat, nihil quod melius effici poterit: ita ut si quis corrigere aliquid velit, aut deterius faciat, aut id quod fieri non potuit desiderabit.

**Q**UANTUM vero à natura feminæ recedant, quæ nec dulces thalamos, nec veneris norunt præmia, innuunt satis commiscendorum corporum mixtæ libidines, quæ in omni hominum genere, at in feminis longe quam in maribus vehementiores exoriuntur: quas cum à natura profectas nullus negavent, tum vero universa eorum forma declarat, cuius gratiâ tam mirabili artificio muliebre corpus natura fabricata est. Adsit enim florenti ætate, plenam jam nubilis annis virgo: totius habitum corporis inspic, hanc oculorum tam clarè nitentium petulantiam, hanc vividæ coloris nitorem, hanc genarum atque oris purpuram, hos in pectore teretes globulos tam æquabili motu oscillantes, cætera denique novis undequaque perfusa guttis ac veneribus delibata, & à quovis bonæ mentis sciscitare quid ista sibi velint, respondebit scilicet quod res est, ut nubat. Ne autem hujus virginis, non secus ac marmoræ: cuiusdam statuat formam tantopere consideremus, juvat, ut Medicos decet, quæ interius in ea geruntur admota veluti face curiosius rimari. Ad quid istæ menstrui sanguinis reciprocationes & humorum undique exundantium perennis in utero influxus, nisi ex his foetus conformetur & alatur? Ad quid illi micantium papillarum globuli, nisi ad lactandos ac fovendos infantes? Quæ cum sapienter à natura sunt instituta; tacita ut ita dicam lege eidem nostris indixisse videtur: quandoquidem & eam tantum ob causam principio rerum ab auctore Naturæ muliebre corpus conditum fuisse constat. At cum ea ratione universi generis humani conversationi natura consilium voluit: tum certe mulierum quoque maximè prospexit incolumitati.

**M**AXIMAM in muliebri corpore humorum constat exundare colluvionem; quibus expurgandis, utrum in proclivi natura constituit, per quem statis temporibus elaberentur. Sed cum ex intumescente in propriis receptaculis semine aut ex nimia crassorum ejusmodi succorum copia atque illuvie & varium angustis sanguinis menstrui vacuatio impeditur, dum per sinuosos vasorum meatus ad uterum labitur effluxurus: compresso motu brevi corrumpitur: mox sursum exundat ac refluit per venas majores, atque in varias corporis partes pestiferum effundit virus. Hinc miseram puellam pallore larvali luridam, repentinis animi deliquis perpetuo deficientem, edulium ciborum fastidio, rerum noxiarum effrenata cupiditate vexatam, vehementissima siti arescentem, lenta febris ac mæsto languore confectam, assidua cordis palpitatio: ne anhelantem, ægrè animam ducentem, hysterici suffocationibus frequenter examinatam inter dolores ac miseras tristissimam vitam trahere cernimus. Quid autem huic melius precemur, nisi ut ejus citò parentur nuptiæ, cique vir quærat, qui non jucundam minus ac parabilem, quam convenientem & necessariam tot malis adhibere noverit medicinam.

**Q**UÆCUMQUE ergo sibi consultum voluerit ubi hac vehementiori tempestate correpta cimbam ausuri sentiet, aurâ potius secunda naviget, quam adversus maris æstum cursum dirigat: cui cedere paululum satius sit, quam adversante ac repugnante naturâ, non sine magno vitæ periculo reluctari. Sed & incassum contra ratio sive anima nititur. Non tanti est ejus autoritas, ut instar Neptuni, dicto citius tumida placet æquora: ut cunque enim corporis principatum sibi vindicat: omnes tamen hujus imperii partes ejus nutu non reguntur; & suis corpus, hoc est naturæ uti legibus vel invita pati cogitur, & quotidie nutrirî, crescere, generare videt injussu suo: ita nec ejus opis est innata hæc vincere ac venerem incantamenta. Quasdam nihilominus pudor tenet, quasdam deterret metus, quasdam necessitas prohibet, ne quod tantopere natura postulat atque expetit, eidem indulgeant, & cum irruentem in se malorum turbam tenent, Medicum adeant ac vulneri fomentum parent. Manent itaque innuptæ, omni humana ope destitutæ: & nisi eas æquus Jupiter amaverit, brevi consensescere, & ante diem suum cadere necesse est.

*Ergo Innupta Aui Brevioris.*

DOMINI DOCTORES DISPUTATURI.

M. Franciscus Maillard.  
M. Joannes Poisson.  
M. Joannes-Claudius Delarbie.

M. Jacobus Desprez.  
M. Renatus Chevrol.  
M. Petrus-Paulus Guyon.

M. Antonius de Catin.  
M. Carolus de Laval.  
M. Dionysius Dodart.

Proponebat Parisiis JOANNES-MICHAEL GARBE, Parisinus, Baccalaureus Medicus. A. R. S. H. 1682.